

Peduru papeu Sesus tuktsa nanabyitaba napykyryknaha sibo ziwatahakazo

Peduru Sesus humo sispirikpotsa bo ziwatahaka. Wastuhu zuba sihyrinymyryktsa wasanibara ty nisihyrinymyryky ana humo hi niakmyikinaha. Iwatahi Peduru Sesus tuktsa pe niy: — Pykyhytutahaktsa siharere bo ka batu yhỹ tsimaha — ana hi ziwatahaka. Deus Peduru ziapewywyky iwatahi Deus harere ziwatahaka, iwatsahi katsa kino niwatihi tanymyryky.

1 ¹Uta Simaõ Peduru, Deus zikwatawy iakzohota. Sesus tsumuêhĩtsa my. Sesus tuktsa sizubarêtsa bo piwatahaka. Papeu humo sibo piwatahaka. Sesus Kiristu wasani nikara, Deus wata my. Atahi Deus bo mymyoktyhyrykta. Ikiahatsa mytuk Sesus humo ahaspirikporêtsa ata humo hi tsikspirikpokonaha. Ihumo tsikspirikponahaze katsaktsa mynamyrêtsa watsa tsimoziknaha.

²Deus harere bo hyỹ tsimykaranaha. Ahawahi iharere bo hyỹ tsimykaranaha iwaze isoho tsinymyrytohinaha. Deus bo ahatsyhyryze my:

— O Deus, myzo atyryktsa tysiakuwyky! tysipokzitsikikta! tsimy — my.

Deus zahawatawyky iwatsahi wasani tsimykaranaha.

³Deus nimywatawy iwatsahi katsa Sesus watsa tsimoziknaha. Atahi wasani mynakara. Imysapyrênikita katsa iwatsa tsimoziknaha. Iwatahi Kiristu tazikwy ty mybo nyny my iwaze iharere bo hyỹ tsimykaranaha iwa tsimyzurukunaha. Katsa nimywatawy anahumo kino myhyrinymyrêtsa hỹ. ⁴Deus harere tihi:

— Kawata ahamysapyrêtsa ahaziurêtsa tsimoziknaha — niy. Anaharere humo hi tsimyspirikponahaze ahapunihikrêtsa hỹ. Ahanamyrêtsa watsa tsimoziknaha. Iharere ty ahabo wasania ty tsipokzitsiarêna mozik.

Nawa ha ty tisapyrēna ty zuba ahabo nyny my. Nawa ha ty tisapyrēna ahabo nyny myze wasani tsimykarana. Pykyhytu iharere bo hỹ taha. Asakta Sesus humo sispirikpobyitsa tu iharere bo batu h̃y zikaha. Iharere batu siakparawy. Ikiahatsa mekywa tu tsimaha. Niwaha hi Deus mozihihik naha zuba tsimyzihiknaha. Ahahyrikporētsa tsimoziknaha.

⁵Iwatsahi ihumo tsikspirikpokonahaze tsipisapykynaha!

Wasani tsimykarana haze Deus harere tsinymyryziukunaha.

⁶Niwa hi Deus nizihik tsinymyrykynahaze ahape tu ahasopyk ahamysapybyitsa tsikykarana tsimowynaha. Ahape tu ahasopyk zeka ahakubyrisorokuja. Ahakubyrisorokrētsa zeka Sesus humo ahamypokzitsirētsa iwaze tu kytsa Sesus humo pahamyjakanaha ikiahatsa ihumo ahamypokzitsirētsa. ⁷Deus humo ahamypokzitsirētsa tu zeka ahatukytsa tsysipywynaha. Batu ahamyi. Ahamyiby zeka usts kytza tsysipokzitsikinaha.

⁸Iwa tahaktsa! Iwa tsimyzurukunaha zeka parakbaha pahasoziunaha:

— Asakta wasani mykarana. Sesus humo sispirikporētsa iwatsahi mysipywykynaha. Usts mysipokzitsikinaha. Sesus tazikwy ty sibo nyny my iwatsahi mysipokzitsikinaha — mykarana.

⁹Asakta Deus harere bo yh̃y ahabyi zeka sihyrikubuyitsa watsa. Kytsa tsikaeni zuba iktsa mykarana. Simysapybyitsa nikarana, Deus botu nisiokzohik anahumo hi nispiriktsokdana.

¹⁰O katukytsa hawa ha ty Deus mozihihik ana humo zuba tsinymyrytohinaha. Iharere bo zuba pykyhytu hỹ tsimaha! Iwa tsimyzurukunaha zeka ba zimynaha. Deus zahawatawy iwatsahi ahamysapyrētsa tsimoziknaha. ¹¹Iwa tsimyzurukunahaze Sesus mymyoktrykta mype my:

— Katuk ahawahi tsimyzurukunaha. Pany kabo tyzekebanahaktsa! Uta kytsa sizubarētsa mysipehaze kaokzeka wasani my ikiahatsa kino niwatihi katukytsa sizubarētsa tsysipehanaha — mykara. Iwa mypehakatsa Sesus Kiristu motsaso. Atahi Deus bo mymyoktrykta.

¹²Tubabatu Deus harere bo hỹy tsikykarana, iharere bo botu hỹy tsimykarana ahaspiriktsokda byihuja! Ana humo hi mopamykysozo.

¹³Utakta kaspituze Deus harere ahabo motsasozo ana hi wasani my.

¹⁴Mohyrikosokda naha humo Sesus Kiristu botu kabo mypubara ty nitsaso. ¹⁵Iwatahi iharere motsasoko. Iharere pykyhytu piwatahaka iwaze mohyrikosokdaze iharere humo batu ahaspiriktsokdahu, iharere bo mytsatzyutaha.

Kiristu tsipunihihrēta. Imysapyrēnikita ana soho hi tsimytsasokonaha.

¹⁶Katsa tsimytsasokonaha batu amybara petu mysopyk mypehakatsa Sesus Kiristu mybarawy bo myziksizo ana tyhi tsimytsasokonaha.

Myziksizoze aparakbaha izikwy bo mokozoneha. Anaharere ikiahatsa bo iktsasoko. Ana kino Deus harere my katsaktsa izikwy botu tsinyana atahi tsipunihikrêta. ¹⁷Deus imyharerewabynikita. Atahi myzo my. Imysapyrênikita my. Sesus hara jobonikita bete Deus ipe niy:

— Kawata tsamysapyrêta hỹ — iwa ipe niy. Deus yksoho tsiwabynaha:

— Atakta katse babata. Ihumo kakurêta. Ihumo kamypokzitsiarêta — niy. ¹⁸Katsa hi iharere tsiwabynaha. Katsa Sesus tuk hara jobonikita beteze Deus yksoho bijoikpe ikny tsiwabynaha.

¹⁹Tubabatu Deus sohokotsa harere humo myspirikporêtsa. Siharere humo myspirikporêtsa, Deus yksoho bijoikpe ikny tsiwabynahaze siharere humo tsikspirikpotohinaha.

Deus sohokotsa harere bo mytsaty tahaktsa! Siharere rika wata. Miwa eze tuze rika iwaze kytsa mypubyi haeze iktsa niaha iwa Deus sohokotsa harere nimyhyrinymyryky iwatsahi tsinymyrykynaha. Myzokorosohoze byrisoik jekyrikoso natakaha. Sesus Kiristu myziksizoze tawata byrisoik jekyrikoso wata. Iwatsahi taperykynahaze Deus sohokotsa harere bo mytsatyziu tahaktsa! ²⁰Deus sohokotsa iharere ty zuba ziwatahakanaha. Hawa mykara ana kino ziwatahakanaha. Deus hyrikoso humo pykyhytutaha ziwatahakanaha. Katsa niwatihi tsimypamykysonaha, Deus hyrikoso humo zuba tsimypamykysoziukunaha.

²¹Deus sohokotsa harere humo nitsasokonaha. Deus hyrikoso nisiapewywyky. Deus hyrikoso humo zuba nitsasoikiknaha.

Deus soho humo meky watu mykaranahatsa.

2 ¹Tapara Sudeutsa tuk Deus sohobyitsa natakaha. — Katsaktsa Deus sohokotsa — mybarapetu nikaranaha. Atsawatu mahazo sihyrinymyrytsa mozumuzonaha. Deus sohobyitsa imysapybara ty pahahyrinymyrynaha. Sesus harere bo batu ma sisopyk anatyhi pahahyrinymyrykynaha. Ikiahatsa kino niwatihi iharere bo batu ma ahasopyk ana hi mozihikiknaha. Deus Sesus Kiristu humo simysapybyitsa tu nikaranaha botu nisiokzohik anahumo kino batu hỹ niaha. Iwaze Deus sohokobyitsa sinini ykarawy bo mysipehahik. Sisopyksapybyitsa atsoko nasipykwy.

²Sizubarêtsa siwatsa imysapybara ty mykaranaha. Iwaze ustsya kytsa sibo iktsa mykaranahaze:

— Sesus tuktsa wasani ahabyitsa mykaranaha. Pimiyikiknaha naka batu imysapy mykaranaha Sesus humo sispirikpobyitsa watsa maha — mybarapetu mykaranaha. ³Sihyrinymyrynikitsa amybara botu motsasokonaha. Tahapehawya ty zuba pahahyrinymyrykynaha. Ahaokyrysaro mozihikiknaha iwatsahi wasanihabara ty pahahyrinymyrynaha. Mysispihikbataikiknaha Deus sibo iktsa mykara. Tubabatu sisoho:

— Kaokzeka batu simysapy — niy. Deus ba zikuru iwatahi nasisuparaka. Bykyze sinini ykarawy bo mysipehahik.

⁴Bijoikpe ezektsa simysapybyitsa nikaranahaze Deus nisisininiwy. Sinini ykarawy bo nisipehahik. Batu sihumo impokzitsi. Sisapy eze miwa zuba, anaeze karikutsitsiwytsa ty nisitsipawarakanaha iwaze nisihurukuknaha. Anaeze piperykynaha, iwa myze Deus mybarawy ezektsa sihuak ty nyny my. Hawa zikzurukunaha ana humo hi sihuak ty sibo nyny my. Asaktsa wasanitsa bo isapyrēnikia ty sibo nyny my. Saustsa simysapybyitsa tu nikaranaha sinini ykarawy bo tahawahi mynapykyryknaha.

⁵Tubabatu taparaktsa simysapybyitsa nikaranahaze Deus nisisininiwy. Batu sihumo impokzitsi. Myto ty nasiharasuwy Noe taoke tahyrytsa tuk iwatsa Deus nisierewy iwatsahi batu isty harasu. Asa zuba Deus harere bo hỹ ziknakaranaha. Tapara myto Noe tihi:

— O kytsa ahamysapybyi tsmoewykynahaktsa! Deus harere bo hỹ tahaktsa! — niy. Atazuba — O myzubaha wasani tsimykarannahaktsa! — nitsasoko.

⁶Tubabatu Sodoma ezektsa Komora ezektsa ahatsa iwa Deus tihi:

— Ikiahatsa kaokzeka ahamysapybyitsa tsimykarannaha — niy. Iwaze nisibabaik. Deus izo bijoikpe ikny zipehahik. Sizubarētsa niharakorobaiknaha. Ana humo hi Deus ustsá nisispirikpokoro. Ustsá simysapybyitsa siakparawytsa, iwaha bo iktsa niahaze simysapybyitsa tymoewy. ⁷Ro zuba niwak. Deus zibetesa zitsumuēhī. Deus okzeka atakta wasani nikara. Zikzibytuhukutu tisikpybyrēta kytsa hudikhudikwy ezektsa simysapybyitsa ziknakaranaha iwatahi tisikpybyrēta. Sisopyk humo iakubyita ziknakara. ⁸Ro tsimysapyrēta nimymyijaikiknahatsa hi batu iaku. Zikzibytuhukutu kytsa tsasohowy ziwabykyze tisikpybyrēta. Hawa simysapybyitsa humo iakubyita ziknakara.

⁹Asaktsa Deus harere bo hỹ mykarannaha. Asahi iharere siakparawytsa mysitsumuēhīkī iwatsahi batu imysapy batu zikaha. Deus zuba ihyrizikporēnikita. Asaktsa iharere bo yh̃ ahabyitsa mysimytsapyriwyky. Ba zikspiriktsokda. Iwa myze Deus motsaso sinini ykarawy bo mysipehahik.

¹⁰Asaktsa simysapybyitsa mozihikiknaha asa bo hi mysisininiwyky. Asahi mymysapybyrikinahatsa Deus harere bo batu yh̃ zikaha. Ata kino mysisininiwyky. Asaktsa ty imysapybara ty zuba mymyhyrinymyrykynaha batu sisikpyby. Simytsatyhybyitsa tu ziknakaranaha iwatsahi imysapybara ty zuba mykarannaha. Kytsa mysimyikiknaha. Tahaokzeka:

— Katsa zuba wasani tsimaha — mybarapetu mykarannaha. Bijoikpe ezektsa Deus tsumuēhītsitsa soho siharerewabymybarētsa. Sisoho zisapybyrikinaha. Siharerepykyhybyikitsa. ¹¹Bijoikpe ezektsa Deus

tsumuēhĩtsita siharerepykyhybyikitsa harere ty hi batu tyso. O ikiahatsa ahamyharerewabyrētsa. Iwatsatu sipunihikrētsa Deus bo batu tyso:

— O asaktsa batu simysapy siharere batu imysapy — maha. Iwa batu tyso Deus zuba ihyrizikporēnikita babata mytsaty nikaranaha.

¹²Asaktsa imysapybara ty mohyrinomyrykynaha siraratsa watsa. Hawa ha ty mozihihiknaha ana ty zuba mykaranaha, siraratsa watsa maha. Mytsaty zikahabyitsa mymyjakanaha. Utsa mysimyjaikiknaha. Deus asahi nasipykwy. Katsaktsa siraratsa werekywy bo mysibanaha. Asa wahi Deus mysipykwy. ¹³Asaktsa ustsá mysisininiwykynaha. Deus mysimytsapyriwy. Kytsa okzeka wasanibara ty mykaranaha. Okoroze simysapybyitsa mykaranaha. Mymyspihikbatakanahaze sakurētsa nikaranaha. Batu sisikpyby. Ahatuk zeka tsahayktsiarētsa watsa maha. Simysapybyitsa nikaranaha humo ahayziktsiarētsa waha maha ahabo mybarapetu mykaranaha. Ahatuk tahadisahakanahaze mymyjaikiknaha. Mymyjaikiknahaze sakurētsa.

¹⁴Wytykyryk bo iktsa mahaze mysiakza tsihikiknaha. Kytsa Sesus humo tsikaeni zuba sispirikporētsa mysimiywykynaha. Mysispihikbatakanaha. Taha bo zuba mynakaranaha. Okyrysaro bo zuba mytsaty mynakaranaha. Deus tihi:

— Utakta pahamytsapyriwy — niy. Ana humo kino ba zikwaknaha.

¹⁵Asaktsa wasani batu siakparawy iwaze Deus harere bo batu ma zikaha. Kytsa nizaranahatsa watsa niyziknaha. Ske babata humo batu sihyrinomyry. Mykurunaha Barão wata Barão Beore tse niy. Atakta wasanibara ty nikara. Okyrysaro nizihikik iwaze imysapybyita nikara.

¹⁶Deus pikuzá ziharerewyky iwaze Barão zibetsakak. Pikuza tihi:

— Ikia Deus harere bo zuba hyỹ tsimykta! — niy. Iwatahi pikuzá tatsihitsa zibetsakak. Pikuza nitsaso Deus zikwy humo niy.

¹⁷Asaktsa wasanibyitsa nikaranaha kytsa mysimiywykynaha. Asaktsa juhoha eze ky mytsehebaik naha eze ky waha. Bijoikpe zatata watsa zopoktsa mynabybykyk zekywa. Hyritsik mynawō naha ziky waha bo mytsaty tsimaha. Atsawatu ja my. Tozeka ja wasani maha, amybara tu sa tsipiperykynaha. Deus sisapy miwaha bo mysipehahik. Sisapy titsikdepykrēna anaeze tahawahi mynapykyknaha. ¹⁸Asaktsa pahamyi tsihikiknaha. Siharere batu sisopyksapy. Sityrykmyitsa. Asahi:

— Katsa zuba wasani tsimaha. Iwazehi ustsá kytsa okeza bo mysiakzanaha. Taha bo zuba tsimynakaranaha. Deus okzeka katsa zuba wasani tsimaha — mybarapetu mykaranaha. Abaka asaktsa Sesus humo mospirikpokonaha asahi mymyi tsihikiknaha. ¹⁹Siharere humo mypehakatza harere bo batu yhyỹ tsimaha, ana soho motsasonaha mybarapetu mykaranaha. Asa hi:

— Hawa ha ty katsa tsimyzihikiknaha iwa tsimyzurukunaha. Katsa wasani tsimyzihikiknaha zeka iwa tsimykaranaha. Katsa wasani ahabyi

zeka atsatu tsimozihikinahaze Deus mymyoktyhyryk — maha. Asaktsa batu zikaha. Imysapybara ty nizihikiknaha iwatsahi wasaniha ahabyitsa mynakaranaha.

²⁰Wastuhu kytsa ziakbatakanahaze Deus harere humo mospirikpokonaha. Imysapybara ty mykaranaha pimoewynaha. Sesus Kiristu harere bo hỹ mykaranaha atahi mysiooktyhyrykta. Kyze kytsa Sesus harere humo batu siakparawy siharere hi piwabyziukunaha. Iwaze Sesus harere humo tsikaeni zuba piwabynaha. Iwatsahi simysapybyitsa mynakarazonaha. Tapara Sesus humo sispirikporëtsa iwatsahi sipunihikrëtsa niyziknaha. Abaka simysapybyitsa mynakarazonaha. Sipunihikbyitsa mozikzonaha. ²¹Kytsa Deus harere humo batu sihyrinymyry meky wa tu asahi tsikaeni zuba mysimyitsapyriwy. Sihyrinymyrybyitsa tu mohyrikosokdanahaze tsikaeni zuba mysimyitsapyriwy. Asaktsa Deus harere zinymyrykynaha iwaze iharere bo tisapyrëna yhỹ nikaranaha kyze Deus sohokobyitsa nisimiywynaha. Iwaze simysapybyitsa nikarazonaha. Deus harere batu siakparawy. Asahi mohyrikosokdanahaze Deus mysisininiwy baba. Taparaka sihyrinymyrëtsa iwaze iharere bo batu yhỹ mynakaranaha, asaktsa Deus sinini ykarawy bo mysipehahik. ²²Iwa nitsasoko:

— Tsikuparini tapytsui bo ziksizo iwaze tadisahazo — tsimaha. Kytsa Deus harere siakparawy bykyze yhỹ ahabyitsa tu zimiyiwykynaha tsikuparini watsa. Katsa iwa tsaso:

— Pazahare pihik ikny inazoze iwaze taparawy bo ziksizo tsahõrõ bo — tsimaha. Atsawatu kytsa Deus harere tsikaeni zuba siakparawy bykyze hỹ aha byitsa tu zimiyiwykynaha pazaharetsa watsa. Asaktsa imysapybara ty mykarazonaha.

Sesus myziksizo.

3 ¹O kaharereziuwytza papeu usa ahabo piwatahaka. Papeu ty ahabo piwatahazo iwatsahi wasaniha bo zuba mytsaty tsimykaranaha. Botu tsiwabynaha anabo mytsatyzo tsimaha.

²Tubabatu Deus sohokotsitsa wasaniha soho nitsasokonaha. Nawa ha ty Deus mykara anaty hi botu nitsasokonaha. Siharere bo mytsatziutahaktsa! Sesus Kiristu myoktykytsa inasik. Abaka iharere tsiwabysiunahaktsa! Anaharere sakzohotsa ahabo nitsasokonaha.

³Mybarawy mynapyksohoze kytsa simysapybyitsa mykaranaha ahabo mozumunaha. Siakmyitsa. Asahi batu sisopyksapy taha bo zuba mytsaty mykaranaha. Asaktsa:

— Sesus Kiristu myziksizo ja — mykaranaha.

⁴— Hawaze sa myziksizo. Haziu mykaranaha. Tapara isuknihibyize atsatu mykara. Taparaktsa botu nihyrikosokdabanaha mybarawy batu ipyk. Koikny baktatu mykara — iwa mybarapetu mykaranaha. ⁵Deus wytyk

bijoikpe iwaha nizukni. Deus harere humo mybarawy niyzik. Wytyk pihik ikny natakahaze. Pihik jobo zatata tuk, pupuputsa wytyk ikny tu niaha. Deus pihik metutu nizapy. ⁶Pihik zubaha eze taparaktsa niakbabaiknaha. Hyritsik natatebaik naha bara humo niharazuzukbaiknaha. Myto humo pupuputsa zitsawakaknahaze niakbabaiknaha.

⁷Abaka bijoikpe mybarawy kino niwatihi Deus tawahi piperyky. Hawa eze zuba Deus myzihikze izo ty mybarawy pikorobawy ana humo hi mymykbaba. Abaka myto bara Deus izo humo mymykbaba. Iwaze kytsa simysapybyitsa mykaranaha sinini ykarawy bo mysipehahik.

⁸O kaharereziuwytza mypehakatsa okzeka estuba okoroze tawa miu anos mytyk tseheze ky wa. Mytyk tseheze ky wa okoroze tawa ihumo atsatu ana bo kino mytsaty tsimahaktsa! ⁹Sesus botu niy:

— Uta myziksizo h̄y — niy. Asaktsa simysapybyitsa hi:

— Atakta myziksizo ja — mykaranaha. Kytsa simysapybyitsaktsa Deus sinini ykarawy bo mytsaty zuba mykara iwatahu tsiakubyrisorokrēta. Ihumo sispirikpobyitsa batu sakbakzyky iwatahi tsiakubyrisorokrēta. Asahi simysapybyitsa tu nikaranaha pimoewynaha iwatahi tsiakubyrisorokrēta.

¹⁰Sesus atsoko myziksizo. Myzubaha typerbyitsatu atsoko myziksizo. Itsyhyryboa tawata unata eze kytsa namy pebykyryk. Iwapuruze Sesus myziksizoze itsyhyryboata mozumuze tawata ity peryhy byitatu mozumu. Iwaze bijoikpe nepyk. Tapara nitotokoknaha ykpyri humo nepyk. Niwa ha ty bijoikpe eze tsizubarēna mohokdaba iwa mopyk. Mybarawy kino niwatihi mokoroba. Deus tsizubarēna pepykba, tsizubarēna mohokdababa ana humo hi ja tsahahyrinmyrētsa.

Deus Sesus myzipehazoze ana humo hi tapery!

¹¹Iwaze ahamysapybara ty tsimykaranaha zeka ahasopyk tsmoewykynahaktsa! Tsipisapywykynahaktsa! Deus harere bo zuba h̄y tahaktsa! ¹²Iwaze Deus Sesus myzipehazoze ana humo hi tapery! Iwazehi bijoikpe mokoroba. Mopyk. Mybarawy eze ky kino niwatihi izo humo mynatsotsokbaik. ¹³Deus mybaratsa pe niy:

— Usa mybarawy mozokni. Usa bijoikpe mozokni usa wytyk mozokni. Anaeze wasanitsa zuba mynapykyryknaha. Simysapyrētsa zuba anaeze mynapykyryknaha — niy. Ana hi taperyky.

¹⁴Kaharereziuwytza ahahumo kamypokzitsiarēta. Hawa eze Sesus myziksizo ana humo hi taperyky. Iwatsahi ahamysapybara tsmoewynaha. Tyzibytuhukutu Deus harere bo ma tsimykaranaha. Wasani iharere bo h̄y tsmaha zeka ahakurētsa tsmoziknaha. Mekywa tu tsmoziknaha. ¹⁵Mypehakatsa aibani zuba myziksizo iwa zeka ustsas kytsa Deus bo mysiokty tsihikik. Iwatahi mytuk tsiakubyrisorokrēta mykara, ana humo kino mytsatziutaha.

Pauro mytsy ihumo mypokzitsirētsa botu ahabo ziwatahaka. Iwapuruze Sesus myziksizoze botu isoho ziwatahaka. Atakta tsihyrinymyrēta babata. Deus zihyrinymyryky iwatahi ahabo ziwatahaka Deus tahyrinymyrywy ibo ziwatawyky atsatu ahabo ziwatahaka.

¹⁶Tsiharerehokdarēta. Imyspirikpowy kino niwatihi tsihokdahaṛēna. Iwatsahi kytsa sizubarētsa iharere myzimyikiknaha. Kytsa asahi Sesus humo sispirikporētsa tsikaeni zuba iharere myzimyikiknaha. Iwatsahi mohyrikosokdanahaze Deus sinini ykarawy bo mysipehahik.

¹⁷Kaharezeziuwyttsa. Kamyspirikpowy bo wabyziutaha! Ikiahatsa Sesus humo ahaspirikporētsa. Kytsa mozumunahaze pahamyi tsihikiknaha ana humo hi ahahyrinymyrētsa. Pykyhytutaha! Asaktsa Deus harere batu siakparawy sihumo pykyhytutaha iwatsahi batu ahamyi.

¹⁸Ikiahatsa hi Deus harere bo zuba hyĩ tsimykaranaha. Mymyoktyhyrykta harere humo zuba hyĩ tsimykaranaha. Atahi ahahumo tsimypokzitsiukrēta. Isoho tsinymyrytohinaha. Ihumo tyspirikpotohinaha. Ipe tsimaha:

— Ikia zuba tsamysapyrēta. Ikia tsapunihikrēta — tsimaha. Abaka ana ty hi tynatsasokonaha. Katsaktsa ituk mywahi tsimynapykyknahaze iwa tsimynatsasokonaha. De. Niwazuba.

Peduru